

**Malittarisassanik atuinerni paasiuminassutsit kingunerisassallu anguneqarnissaat siunertaralugit Namminersorlutik Oqartussat suliffeqarfiutaanni aamma tamakku ataanni suliffeqarfinni siulersuisuni ilaasortat akissarsiaqartinneqalernissaannut politikimik pisortatigoortumik 2019-imi ukiaanerani ataatsimiittoqannginnerani Naalackersuisut saqqummiusseqqullugit Inatsisartut aalajangiiffigisassaattut siunnersuut.**

Inatsisartunut ilaasortaq, Pele Broberg, Partii Naleraq

## **Akissuteqaat**

(Naalackersuisut Siulittaasuat)

### **1. Siullermeerneqarnera**

Naalackersuisut akissarsiaqartitsinissaq pillugu aalajangiiffigisassatut siunnersuummik saqqummiusseqqullugit Naalackersuisut qujarusupput. Taamaalillutik Naalackersuisut akissarsiaqartitsinissami immikkoortut pingaarnerit aamma Naalackersuisut sulineranni akissarsiaqartitsinissaq pillugu politikip qanoq atorneqarnera pillugit ilisimatitsinissaminnut pissutissaqalerput.

Ataatsimut isigalugu akissarsiaqartitsineq pillugu politiki ullutsinnut naleqquttuussasoq, akissarsiat ilaatigut akisuusaaffimmut sulinerimullu takussutissaassasut aamma akissarsiaqartitsineq pillugu politikip piginnaanilinnik Namminersorlutik Oqartussat ingerlatseqatigiiffiutaanni siulersuisuni atugassanik sulisussarsionermut tunngavissiissasut Naalackersuisut isumaqarput.

Akissarsiaqartitsineq pillugu politiki atuuttoq 2014-imeersoq ingerlatseqatigiiffinni pitsaasumik aqutsinissamut malittarisassanik, taakku 2011-mi Inatsisartuni politikerinit tapersorsorluarneqarput, aallaaveqarput. Akissarsiaqartitsineq pillugu politiki Namminersorlutik Oqartussat aktianik ingerlatseqatigiiffiutaanni siulersuisunik akissarsiaqartitsinissamik Naalackersuisut aalajangerannut ajunngilluinnartumik tunngavimusimavoq. Taamaattumik akissarsiaqartitsineq pillugu politiki 2014-imeersoq Naalackersuisut sulineranni suli atuuppoq. Tamakku saniatigut akissarsiaqartitsineq pillugu politiki Namminersorlutik Oqartussat ingerlatseqatigiiffiutaanni Namminersorlutik Oqartussanit tamakkiisumik pigineqanngitsuni aamma atorneqartartoq paasissutissiissutigisinnaavara.

Taamatuttaaq akissarsiaqartitsineq pillugu politiki atuuttoq ilaatigut akissarsiassanik aalajangersaanerit sulinerit imminnut ataqatigiilluinnarnissaannut siunnersuutitaqarpoq. Aammattaaq ingerlatseqatigiiffinni siulersuisut ataatsimut isigalugit akissarsiaqartitsinissamik, takunnissinnaanermut sulinerimullu naapertuunnerpaanik akissarsiaqartinneqassasut siunnersuutigineqarpoq. Tamanna siusinnerusukkut malittarisassanut akerliuvoq, tassami taamani akissarsiat assigiinnigitsut ingerlatseqatigiiffiit kaaviiartitaat naapertorlugit aalajangersarneqartarmata.

Malittarisassanik atuinerni paasiuminassuseq kingunerisassallu pillugit aalajangiiffigisassatut siunnersuummi nassuiaatit innersuussutigalugit Naalackersuisut akissarsiat pillugit politikimi

malittarisassanik malinnaanermik saniatigut aamma Namminersorlutik Oqartussat aktianik ingerlatseqatigiiffiutaanni siulersuisuni ilaasortat akissarsiaqartinneqarnissaat pillugit aalajangernerminni Naalakkersuisut ammanerulernermit paasiuminarnerulernernullu timitaliillutik peqataassasut Naalakkersuisut isumaqarput.

Siullermik akissarsiat pillugit tamanit pissarsiarineqarsinnaasumik politikeqarpoq aamma ingerlatseqatigiiffinni akissarsianut atuuttunut takussutissat tamanit pissarsiarineqarsinnaapput.

Aappassaattut Naalakkersuisut ataatsimiinnerannit imaqarnilianik taakku nittartagaatigut tamanut saqqummiisoqartarpoq, tassunga ilanngullugit Namminersorlutik Oqartussat aktianik ingerlatseqatigiiffiutaanni ataatsimeersuarnissat sioqqullugit Naalakkersuisut aalajangernerat. Naalakkersuisut aalajangernerannik tamanut saqqummiussinerit tamanut ammanerulernermit assersuutaavoq, tassani pisortat suliarinnittarnerat pillugu inatsimmi Naalakkersuisut ataatsimiinnerannit imaqarnilianik takunnissinnaatitaaneq toqqaannartumik ilaatinneqanngimmat. Pisutsit assigiinngitsut pissutigalugit Siulittaasup aalajangiinerisa Naalakkersuisut nittartagaanut ilioqqaasoqarneq ajorpoq.

Pingajussaattut Namminersorlutik Oqartussat aktianik ingerlatseqatigiiffiutaanni ataatsimeersuarnernut tusagassiortut iserlutik tusarnaarsinnaatitaapput.

Kiisalu Namminersorlutik Oqartussat aktianik ingerlatseqatigiiffiutaanni ukiumoortumik nalunaarusiami ingerlatseqatigiiffimmi siulersuisunut aningaasartuutit paasissutissiissutigineqartarnissaat piumasqaataasoq erseqqissaatigineqassaaq.

Inatsisartut kingullermik ataatsimiinnerisa kingorna aktianik ingerlatseqatigiiffinni ataasiakkaani siulersuisut aamma siulersuisut akissarsiassaannik aalajangersaanerni allannguutit tigusaasut ilaat tamanit immikkut eqqumaffigineqarsimapput. Tamakku allannguutit siorna akuersissutigineqartut aamma ingerlatseqatigiiffinni pineqartuni immikkut ittumik ataatsimeersuarnerni piviusunngortinneqartut ilaannut tunngapput.

Pisuni taaneqartuni inuit pisulluunniit ataasiakkaat pillugit Naalakkersuisut tigussaasumik oqalinnissaq kissaatiginngilaat. Kisianni allannguutit aalajangiiffigisassatut siunnersuummi saqqummiunneqartumi tunngavilersuutitut imartoorujussuusut siunnersuuteqartup § 37 naapertorlugu apeqqutigisaani arlalinni akissutinni eqqartornikuullugit paasissutissiissutigisinnava. Akissutit taakku Inatsisartunut ilaasortanut tamanut siammarterneqarnikukusut innersuussutigaaqka.

Tassunga tunngatillugu allannguinerit inatsisitigut unioqqutitsisuunngitsut, suliamik paasinniluarsimasuusut aamma akissarsiat pillugit politikimut malittarisassanullu allanut atuuttunut naapertuuttut tunngavilersuuteqarluartullu Naalakkersuisut aalajangiusimavaat. Naalakkersuit aalajangiineranni sukut tamaanaarnerit, nalaatsornerit, inatsisinik unioqqutitsinerit politikikkulluunniit kammalaatersornerit aalajangiiffigisassatut siunnersuummi tunngavilersuutigineqartutut issimangillat.

Taamatuttaaq Naalakkersuisut suliassaqarfinni aalajangiisarneranni Naalakkersuisut, ingerlatseqatigiiffiit siulersuisulluunniit attorneqartut isiginerlunneqanngitsut Naalakkersuisut isumaqarput, soorlu aalajangiiffigisassatut siunnersuummi tunngavilersuutini taamaattoqarneraasoqaraluartoq.

Ataatsimut isigalugu aalajangiiffigisassatut siunnersuutip annertunersaa naatsorsuutigisat kukkusut tunngavigalugit saqqummiunneqartoq Naalakkersuisut isumaqarput. Tamanna aalajangiiffigisassatut siunnersuummi namminerimi ilusilersuinerimi aamma uteqattaarneqarpoq. Siunnersuummi akissarsiat pillugit politikip pisortatigoortitsisunngortinneqarnissaa, pisortatigoortumik uffa atuutereersoq, siunertarineqarsimagunarpoq.

Aammattaaq siunnersuummi malittarisassanik atuinerni paasiuminassutsip kinguneqartitsisarnerullu anguniarneqarnissaat oqaatigineqarpoq. Naalakkersuisut aalajangiiffigisassatut siunnersuummut nassuiaataanni malittarisassanik atuinerni paasiuminassuseq kinguneqartitsisarnerlu ullumikkut atuutereersut Naalakkersuisut isumaqarput.

Tamanna tunngavigalugu Naalakkersuisut aalajangiiffigisassatut siunnersuummut isumaqataasinnaannaanatillu siunnersuutip itigartitsissutigineqarnissaa inassuteqaatigaa.